

Yaucangj yawj gwnz daiz miz song fung saenq, najbyak cungj nyaeuq hwnjdaeuj.

Haenx dwg hagseng bounsai sij hawj dah hagseng ndeu, saenq dwg baenzneix sij: “Dahmeij ndiepgyaez, gou seizseiz cungj siengj mwngz, hwnjdangz seiz, ndaw uk gou cungj yienh aen ngaeuz gyaundeiz mwngz…… Daeggyangz siengj mwngz.” Fung saenq wnq dwg saenq hoiz, yienghneix sij: “Daeggyangz ndiepgyaez, gou hix siengj mwngz! Docih mwngz siengj gou, aenvih miz mwngz, gou cij gvaq ndaej gig raeujrub……Dahmeij siengj mwngz.”

Yawj saenq sat, yaucangj ndang cungj hwnj naenggaeq. Geij bi neix, hagseng yied daeuj yied nanz guenj, mbouj gangj haenqrengz doegsaw, lienz gihbwnj gijliz cungj mbouj cunhsouj. Ceiqgaenh hagseng guhyoux baenzlai, neix hawj yaucangj gyauej in dangqmaz.

Moix aen singhgiz gyoebcomz hagseng seiz, yaucangj cungj giengzdiuh hagseng mbouj ndaej guhyoux, lij diemjmingz bihbingz caeuq heuh boux hagseng guhyoux hwnj gwnz daiz, mizmbangj hagseng lij deng heuh cawjranz daeuj daiq baema ranz youq geij aen singhgiz. Hoeng, gyoengq hagseng lij laeglemx laebdaeb guhyoux.

Daxbaenh, banhcujiyin Siujyangz soengq song fung saenq neix daeuj, hawj yaucangj gamjdaengz cingzgvang gig naek. Yaucangj baenzlawz hix siengj mbouj doeng song boux hagseng neix rox guhyoux. Song boux haenx boux ndeu dwg cuhcungh sam nienzgaep, boux ndeu dwg it nienzgaep, boux ndeu gyausiz youq 5 laeuz, boux ndeu gyausiz youq 1 laeuz, liz ndaej gig gya. “Baenzlawz bae fuengzre hix mbouj miz yungh ha!” Yaucangj danq dwk naeuz.

Yaucangj gietdingh caeuq gyoengqde gangj baez ndeu, gangj mbouj dingh song boux hagseng neix nyienh dingq gij vah de, doeklaeng mbouj guhyoux yungh sim bae doegsaw. Yaucangj hawj banhcujiyin heuh Siujyangz caeuq Siujmeij daeuj bangunhsiz de.

Yaep he, song boux hagseng ndwn youq dangnaj ngaem gyauej. Yaucangj gven dou hwnjdaeuj vix fung saenq naeuz: “Gij sawloih sou caen fungfouq, sij ndaej gig gamjdoengh. Hoeng gij

•cienlanz sawcuenh•

Aen Conghciengz Ndeu

一个墙洞

□ Siz Buogzew ogz / 石鹏程

sach neix wnggai youq sou maj baenzvunz guh cij deng, sou nyinhnaeuz gou gangj ndaej deng lwi?”

Siujgyangz cungj naeuz: “Gou loek lo, yaucangj! Gou itdingh gaij.”

Yaucangj ngaekgyaeuj naeuz: “Ndei, mwngz rox swheij loek couh baenz, doeklaeng aeu haeujsim doegsaw.”

Yaucangj youh baenq ndang gvaqbae cam Siujmeij: “Mwngz ne?”

Siujmeij haeb henj naeuz: “Gou mbouj loek. Gou dan sij saenq hawj boux vunz gou maij, miz maz loek?”

Yaucangj dingq gij vah neix, hozndat dangqmaz, naeuz: “Nanzdauh mwngz lij deng? Sikhaek daj denva hawj cawjranz mwngz daeuj yozyau! Gou siengj yawj bohmeih mwngz baenzlawz gangj! Bohmeih mwngz denva hauhmax dwg geijlai?”

“Mbouj rox!” Siujmeij yaek aeu dingj daengz daej bae.

“Ba!” Yaucangj aen gienz ndeu moeb youq gwnz daiz, song fung saenq haenx doek daengz gwnz namh. Boux hagseng neix caen dwg mbouj najmong!

“Lauksaed hoizdap vwndiz gou, mboujne sik-haek baema ranz!” Yaucangj sing hung naeuz. Siujmeij baez dingq gij vah neix, mbouj gamj guengz lo.

“Doxgyau geijlai nanz la?” Yaucangj cam.

“4 aen singhgiz.” Siujyangz han.

“Dwg bouxlawz haidaeuz gonq?” Yaucangj cam.

“Dwg gou!” Siujyangz naeuz.

“Mbouj dwg! Dwg gou! Dwg gou sij saenq hawj de gonq”, Siujmeij lae raemxda dwk naeuz,

“Bohmeih gou cungj bae baihnamz guh hong geij bi lo, soqlaiz mbouj ma ranz gvaq, cij lw gou caeuq daxbuz caez gvaq saedceij. Youq ndaw yozyau, doengzhag mbouj gya. gou, lauxsae hix mbouj swt gou, mbouj miz vunz gvansim gou. Gou baenzbingh seiz, cungj dwg Siujgyangz bang gou cawx yw, lij daj conghciengz soengq yw hawj gou, lij sij gij vah gujli hawj gou.”

“Maz conghciengz?” Yaucangj baez doeksaet, muengz cam.

“Suzse gou caeuq Siujgyangz cij gek faq ciengz ndeu, gwnz ciengz miz aen congh”, Siujmeij naeuz, “Dou couhdwg daj aen congh neix soengq saenq.”

“O, yenzlaiz dwg yienghneix!” Yaucangj rox lo.

Yaucangj doiq song boux haenx naeuz: “Sou baema hwnjdangz gonq ba! Baezlaeng mbouj ndaej caiq guhyoux, yungh sim doegsaw cij dwg sach youqgaenj!”

Siujyangz caeuq Siujmeij ngaekngaek gyauej, okbae lo.

Yaucangj fwt dwk denva, naeuz: “Vangz cujiyin ha, cingj mwngz dunghcih gyoengq lauxsae haemh neix 8 diemj buenq youq veiyisiz haihoih, raeuz aeu saek aen conghciengz ndeu.”

“Saek aen congh ciengz ndeu lij aeu baenzlaiz vunz caez daeuj ha?” Denva baihaenx cienz daeuj gij singyaem geizheih.

“Neix gaenq mbouj dan dwg aen conghciengz ndeu lo, gij conghloek raeuz lai raixcaix.” Yaucangj naeuz.

Byaijgyawj Canghyw

走近牙医

□ Banh Vwnzcingh / 潘文清

Daxmeh naeuz, de 29 bi bihaenx, yungh muhrin muh haeux seiz, mbouj siujsim deng gaenzmuh saeg raek bae song diuz heujnaj.

Doeklaeng daxmeh couh mbouj gya. gangjriu. Daxmeh gag riu naeuz: “Aj bak riu lumj vaizmeh angq rumzbaek nei, gaxgonq gyaundeiz, ngamq hwnz ndeu bienqbaenz boux yakyawj lo.”

Gvaq duenh seizgan he, daxmeh yaem daxboh bae ra canghyw, caegcaeg sieng song aen heujgim, vih neix, daxmeh yungh gij ngaenz de gag yo haenx liux lo.

Yienznaeuz gaenq sieng song aen heujgim, hoeng gij heuj daxmeh couh mbouj baenzneix maenh lo, moix gek song sam bi cungj yaek bae ra canghyw coih heuj. Daengz haj roekcib bi, couh hainduj cang cungj heuj ndaej hozdung he.

Daxmeh caeuq gou swnghhoz cibgeij bi, moix baez cungj dwg gou daiq de bae yawj canghyw. Geij bi gonq de ma lajmbanj le, gou gig noix gvaqsim gienh sach neix. Mboengq saedceij gonq, gou ma yawj de, bang de sousib doxgaiq, sawqmwh fatyienh gij heuj ndaej hozdung haenx gaenq dek baenz song mbiengj lo, couh cam de: “Daxmeh, gij heuj mwngz vaih lo, vihma mbouj naeuz ne? Lij caegcaeg yo hwnjdaeuj, mwngz baenzlawz gwn haeux ne?” Daxmeh gig caemdingh naeuz: “Vaih couh vaih lo, aeu nohheuj menhmenh nyaij, couh ndaej gyan roengzbae lo. Gou laux lo, mbouj siengj sai ngaenz

lo……”

Gou miz di sim’in. Gou duk gij heuj dek baenz song mbiengj, daengz ndaw singz bae ra canghyw, sim siengj: Mboujguenj baenzlawz, itdingh aeu bang daxmeh caiq guh song diuz heuj.

Gou buet doh ndaw singz hunghung iqiq geijcib aen ywheuj cinjsoj, gawqyienz mbouj miz saek boux cieq gij hong gou, lijyouz gyoengqde dwg, itdingh hawj daxmeh gou daengz cinjsoj, mboujnex mbouj ndaej guh. Gou gej naeuz, vunzlaux gaenq 90 lai bi lo, naengh ci mbouj ndaej souh, mbouj ndaej daeuj. Gou naihsim dwk gouz canghyw, nyienh lai ok boix ngaenz, muengh gyoengqde daengz ranzcoj gou bae fuzvu. Hoeng mbouj miz boux canghyw lawz nyienh bae.

Gou nyapnyuk geij ngoenz, doeklaeng siengj ok aen banhlap ndeu: Ma ndaw cin ra canghyw.

Ra bae ra dauq, youq gwnz cin iq ra raen boux canghyw nienzgeij lij oiq he. Gou dapwngq haici cieqsoengq, cingj de daengz ranz fuzvu, caemhcai youz de dingh gyaq, gou mbouj gangj gyaq. Boux canghyw doengzeiq riengz gou bae lajmbanj. Gou daj ndawsim docih de.

Canghyw daeuj daengz ranz, cingj daxmeh haeb vunq, yienzhauh ma ndaw cin guh heuj. Gvaq aen singhgiz ndeu, gou dawz gij heuj gyaj guh ndei haenx, sikhaek haici ma ranzcoj hawj daxmeh.

Daxmeh siujsim sisi dwk cang song diuz heuj



Dahsau daenj doxgaiq ngaenz riu ndaej diemzsoebsoeb.

haeuj bak, song gemj gumh roengzbae haenx sikhaek bongz hwnjdaeuj lo. Gou cam: “Meh, habcik lwi?” Daxmeh riu naeuz: “Baenz, baenz, beij diuz gonq lij ndei. Lwg a, geijlai ngaenz lo?”

Gou mbouj dawz haeujsim dwk dap: “Meh, ngamq geijcib maenz ndwi.” Daxmeh buenq saenq buenq ngeiz, caengz gou mbat ndeu. Gou mbouj ndaej lwnh de nyi, gou yungh baenz geij cien maenz guh gij heuj de, yienghhaenx de couh sim mbouj onj lo. Cijaeu daxmeh yungh ndaej ndei couh ndaej.